

Акафист святому праведному Иоанну Кронштадтскому чудотворцу



Акафист святому праведному Иоанну Кронштадтскому чудотворцу

Кондак 1

Избраннаго и вернаго во иереех Божиих восхваляем тя, богоносне отче Иоанне!/ Ты бо Евангельской Истине последуя, Христу всем сердцем сораспялся еси,/ струю чудес и исцелений всем верным источаеши и ко спасению их направляеши./ Мы же молитвами твоими в вере, надежде и любви укрепляеми, благодарне зовем ти:// Радуйся, Иоанне, земли Российския молитвенниче предувный.

Икос 1

Ангела молитвы и проповедника покаяния ведаем тя, блаженне отче. Ходатайствуеши бо за нас у Престола Божия, да в разум истинный приидем и жизнь свою на путь спасения направим, взывая тебе:

Радуйся, благодати Божия сосуде избранный;

Радуйся, Премудрость Божию, яко млеко матери, сладостно впитавый;

Радуйся, Ангелу хранителю твоему, яко Товия древле, вседушевно последовавый;

Радуйся, боголюбивых родителей целомудренный плод чистоты непререкаемый;

Радуйся, в повиновении родителям своим благословение Божие стяжавый;

Радуйся, от юности твоея водительству Духа Святаго прилежавый;

Радуйся, всем сердцем твоим Бога возлюбивый;

Радуйся, в меру возраста Христова Богомудренно возраставый;

Радуйся, Иоанне,/ земли Российския молитвенниче предувный.

Кондак 2

Предвидя, яко многия беды и соблазны грядут на Церковь Русскую и чада Божий в смятении будут, яко пастырь добрый, душу свою за паству свою готовый положить, глагола еси людям: «Убойтесь соблазнов, стойте в вере Православной, мужайтесь и крепитесь, и славьте Господа, взывая Ему: Аллилуиа».

Икос 2

Разумом Божественным просвещаемый, богословия струи животочныя источил еси, всеблаженне отче Иоанне, в посте и молитве словеса Божия со слезами в сердца верных сея, к свету истиннаго Богопознания чад земли нашея призывал еси. Тии же, в любви Божии укрепляющесе, пояху тебе таковая:

Акафист святому праведному Иоанну Кронштадтскому чудотворцу

Радуйся, Евангельския Истины пламенный ревнителю;
Радуйся, глаголов жизни вечныя неумолкаемый возвестителю;
Радуйся, равноангельным житием твоим достойно украшенный;
Радуйся, у Престола Божия о людях ходатаю верный;
Радуйся, от юности Церкви Христовой всем сердцем прилепившийся;
Радуйся, Христу сораспятися о людях вседушевно возгоревшийся;
Радуйся, любовью Христовою сердце твое, аки ниву благоплодную, возделавый;
Радуйся, людям, в скорбех и печалех изнемогшим, состраданием и молитвою облегчение подававый;
Радуйся, Иоанне,/ земли Российския молитвенниче предивный.

Кондак 3

Силою Божественныя благодати, яко углем горящим у жертвенника Божия возжжен, светильниче многосветлый во граде Кронштадте просиял еси, отцев наших похвало, отче Иоанне. Сице бо во тьме греховней обураемых и соблазном богоборчества колеблемых зарею Божественнаго разума просветил еси и научил еси пети: Аллилуиа.

Икос 3

Имея любовь велию людям, Кровию Сына Божия искупленным, потекл еси к неимущим благочестия, трезвения и страха Божия и отчаянием обураемым, пастырю добрый Иоанне, сих же кротостию и смиренномудрием покорив Христу, научил еси благодарно взывати тебе таковая:

Радуйся, сущих во тьме и сени смертной премудрый просветителю;
Радуйся, о спасении людей, в пучине греховней обураемых, благостный попечителю;
Радуйся, неведущих Бога и окамененных сердцем к покаянию пробуждаяй;
Радуйся, Божественною премудростию в писаниях твоих нас озаряяй;
Радуйся, сердец строптивых и злонравных благостное умягчение;
Радуйся, ленивых и коснеющих совестью щедролюбивое обличение;
Радуйся, Слова Божия и правды Его проповедниче неустрашимый;
Радуйся, житием благонравным козни духов злобы поднебесных победивый.
Радуйся, Иоанне,/ земли Российския молитвенниче предивный.

Акафист святому праведному Иоанну Кронштадтскому чудотворцу

Кондак 4

Бурю злонравия воздвигаему на Церковь нашу Святую ведал еси, отче Иоанне, яко верный страж дома Господня, научал еси овцы Христовы бдети и право ходити в истинней вере и в заповедях Господних непорочно пребывать, да чистым сердцем и устами непрестанно взывают к Богу победную песнь: Аллилуиа.

Икос 4

Слышаще о тебе, яко ты еси сосуд избранный и благодатных даров преисполненный, подвигов милосердия и нищелюбия ревнитель, вдов сирот, страждущих и обремененных утешитель и о нераскаянных грешницах молитвенник слезный, не токмо от Кронштадта, но и от всех конец земли потокоша к тебе людие Божии, исцеления от тебе получаху. С ними же и мы гресех своих кающиеся, яко ходатаю о нас пред Богом теплу, умильно зовем ти:

Радуйся, сеятелю правды, слезами твоими землю нашу освятивый;
Радуйся, обличителю неправды, души верных от прелести греховных свободивый;
Радуйся, свете сердец кротких и разумных, путь к Богу указуяй;
Радуйся, ученьми твоими, яко кормилица кроткая нас греяй и питай;
Радуйся, всех скорбящих и обремененных неложное упование;
Радуйся, болящих и от духов злых страждущих благодатное врачевание;
Радуйся, сосуде избранный, дары Духа Святого туне верным источивый;
Радуйся, не о людях токмо, но и о скотех милосердовавый;
Радуйся, Иоанне,/ земли Российския молитвенниче предивный.

Кондак 5

Яко небосветлая звезда священнолепным житием твоим просиял еси, пастырю Христов Иоанне! Богом дарованное тебе наследие от волков, губящих е, словом Божиим ограждал еси, пастырски взывая: возьмите Крест Господень, на Немже Христос - Царь славы - рукописание грехов наших изгладит, в Нем же миру востание во веки. Мы же, сим знаменующеся, поем с тобою Бога победную песнь: Аллилуиа.

Икос 5

Видевше тя Российстии людие дивно на свещнице церковной сияюща, правды Божия ищуще, к тебе притекаху, и яко другу Христову, исповедаху

Акафист святому праведному Иоанну Кронштадтскому чудотворцу

грехи своя. Мы же, обремененнии многими прегрешениями, к тебе, блаженне Иоанне, прибегаем и тако глаголем:

Радуйся, яко силою благодати, яже в тебе, немощнии духом в любви Божии укрепляются;

Радуйся, яко твоими молитвами кающиеся плена греховнаго свободяются;

Радуйся, яко труды твоими алчущии и жаждущии Правды Христовой насыщаются;

Радуйся, яко благовестием твоим врази Христовы посрамляются;

Радуйся, яко молитвами твоими силы ада содрагаются;

Радуйся, яко воздеянием рук твоих врата небесная верным отверзаются;

Радуйся, в умилоствление за народ наш молитву, яко кадило благовонное, херувимски Богу приносимый;

Радуйся, за неведующих правды и любви Божия молитися нас подвигнувый;

Радуйся, Иоанне,/ земли Российския молитвенниче предивный.

Кондак 6

Проповедницы чудных деяний твоих, блаженне Иоанне, явишася мнози: богатии и нищии, старцы и юноши. Ты бо всем Любовь свою изливал еси. Темже не токмо православнии, но и иновернии силою молитв твоих милость Божию обретаху, поя Богу: Аллилуиа.

Икос 6

Возсиял еси житием твоим в Церкви Православней лучезарнее сияния севернаго, светом Евангелия Христова Отечество наше просвещал и от сетей вражиих чада ея ограждал. Тем же и ныне молим Господа сил, да любовь святая утвердится в сердцах наших, во еже ни скорбь, ни теснота, ни смерть не возмогут нас разлучить от любви Божия. И тако достигше сего, тебе воззовем:

Радуйся, яко Божиим смирением грядущая на ны предвозвестимый;

Радуйся, тесным путем в заповедях Божиих ходити нас научимый;

Радуйся, в скорбех и печалех сущим источник радости в Бозе указамый;

Радуйся, оную радость, яко зеницу ока, свято хранити нам завещамый;

Радуйся, десницею и шуицею оружие Правды Божия содержаяй;

Радуйся, в словесе истины и любви нелицемерней Сыну Громову уподобивыйся;

Радуйся, порфирию покаяния всех облекаяй;

Радуйся, диадимою благодати славно увенчанный;

Радуйся, Иоанне,/ земли Российския молитвенниче предивный.

Акафист святому праведному Иоанну Кронштадтскому чудотворцу

Кондак 7

Хотя Всеблагий Господь спасти люди земли нашея и, яко злато в горниле огненнем, очистити я, вложи в уста твоя, всеблаженне, дух премудрости и разум провидца, во еже чрез покаяние сердечное и сокрушение слезное преуготовати я в вере непоколебимых к жертвенному служению, да со всеми святыми, в земле Российской просиявшими, ангельски вопиют Богу: Аллилуиа.

Икос 7

Новаго избранника Божия, всеблаженне Иоанне, ведяще тя у Алтаря Господня за всех молитвою слезною Христу сраспинающаяся, боголюбивии людие с верою к тебе притекаху и душевне и телесне исцеляхуся. Темже и мы, в немощи сущии, молим тя прилежно: воздвигни руце твои и не премолчи за ны ко Господу, якоже отец о чадах своих, да умножит Господь милость Свою на нас, приносящих ти сицевая:

Радуйся, у Престола Божия прилежный о нас печальниче и ходатаю;

Радуйся, покаяния слезнаго усердный глашатаю;

Радуйся, образе неусыпнаго делания, Христу Богу работати прилежно нас наставляеши;

Радуйся, яко на божественней страже веры апостольския стояти нас утверждаеши;

Радуйся, образ воздержания и целомудрия добре показавый;

Радуйся, суеверия, ереси и злохуления от стада твоего отсекавый;

Радуйся, сущих во тьме неведения славный просветителю;

Радуйся, душ человеческих от суеты житейския мудрый восхитителю;

Радуйся, Иоанне,/ земли Российския молитвенниче предивный.

Кондак 8

Странное чудо видим на тебе, предивный пастырю Христов Иоанне! Сама бо Пречистая Матерь Божия ублажити тя и последующих тебе и с радости благоволение Божие всем возвести: о милейшия вы чада, Отца Небеснаго! Сице бо радость Церкви Небесныя о подвиге земныя предвозвести. Сего рад и мы, надеждою на предстательство о нас Матери Господа Сил согреваеми, вопием Царю всех веков: Аллилуиа.

Акафист святому праведному Иоанну Кронштадтскому чудотворцу

Икос 8

Весь желанием Божиим распаляемь, носитель любви Христовы явился еси, пастырю добрый. В ней бо милость и истина сретостеся, правда и мир облобызастеся; всякая же лесь упразднися, еретическое же злонравие, яко тля, попалися, скорби же человеческая елеем милосердия твоего утолишася. Мы же, нерадивии, сокровищ сих не стяжахом, праведным судом Божиим многим скорбем и печалем достойни явихомся. Но, ведуща тя помощника неусыпна, умильно зовем ти:

Радуйся, любви Христовой неутомимый носителю;

Радуйся, мира и правды ревностный сеятелю;

Радуйся, веры православных незыблемый хранителю;

Радуйся, благочестия и добронравия насадителю;

Радуйся, о всем мире печальниче и слезный молитвенниче;

Радуйся, Церкви Христовой немеркнувший светильниче;

Радуйся, отцев наших похвало, нам же надежду и утешение;

Радуйся, Богоизбранный пастырю, Святыя Руси благодатное украшение;

Радуйся, Иоанне,/ земли Российския молитвенниче предивный.

Кондак 9

Всем сущим в бедах и скорбех житейских воздвиже Господь на радость пастыря и чудотворца предивна Иоанна, да хромыя и расслабленныя, слепыя и от духов злых томимыя исцелит, в пагубнем пьянстве и супружестей неверности растлеваемыя к непостыдней жизни призовет, а яже во озлоблении сущия к Богу приведет и сице в душах верных царство Правды Божия насадит, да воспоем вси спасительную песнь Богу: Аллилуиа.

Икос 9

Вития многовещания недоумеют изъяснити силу молитвы твоя, Иоанне предивне, егда три юноши, дерзнувших поглумитися о тебе и молитве твоей, спасительне наказал еси. Узрев же я кающихся и слезно молящихся, исцеление злохулителю от Бога испросил еси. Тии же, познавше молитвы твоя силу чудодейственную и любви твоя милосердие теплейшее, яко Божия провидица, ублажиша тя похвалами таковыми:

Радуйся, благое икономство чина своего богомудренно соблюдии;

Радуйся, данный тебе залог, Тело Христово, цел и невредим до последнего твоего издыхания сохраниивый;

Радуйся, скрижали Богоначертанныя обою Заветов достойне возвестивый;

Радуйся, Церковь Христову благочестием пастыря добра прославивый;

Акафист святому праведному Иоанну Кронштадтскому чудотворцу

Радуйся, истинного просвещения и христианского благочестия ревностный насадителю;

Радуйся, кающихся грешников, сирых и убогих милостивый покровителю;

Радуйся, мудрый путеводителю, стези правды юным указуяй;

Радуйся, судие нелицеприятный, зломудрствующия любовью наказуяй;

Радуйся, Иоанне,/ земли Российския молитвенниче предивный.

Кондак 10

Спаси хотя души ближних своих, ересьми и маловерием обуреваемая, противу кознем диавольским воздержанием и смирением вооружился еси, отче Иоанне, апостольское и святоотеческое веры исповедание твердо сохранив. Жертвенною же любовью Христу сраспинайся, душу твою за спасение народа Божия положив, Царствия Небеснаго достигл еси, идеже со Ангелы и лики святых непрестанно Бога Славословя, поминай нас, славную память твою празднующих и поющих Богу: Аллилуиа.

Икос 10

Стена твердая бысть любовь твоя ко Господу, в ней же утвердися сердце твое, богоносне, отче Иоанне. Сего ради всем притекающим к тебе с верою прибежище и утверждение явился еси, да всяческая Христу приобретаеши. Темже и нам, к тебе припадающим, буди стена крепка и ограждение непреодолимое, да не посмеются о нас, хотящия нам злая, во еже в мире и любви Христове пребывати и приносить сия похвалы:

Радуйся, светильниче неугасимый, огнем Духа Святого возженный;

Радуйся, крине, присно благоухаяй, росою благодати Божия напоенный;

Радуйся, росо сладкоплодная, благодатными дарами верных ожитворяющая;

Радуйся, доле земли, от греховнаго тления нас сохраняющая;

Радуйся, в мире житейском обуреваемым тихое пристанище;

Радуйся, яко душевне и телесне изнемогающим о помощи Божией умоляеши;

Радуйся, сердцеведче предивне, верныя от лжемудрствования ограждаяй;

Радуйся, силою молитвы чистыя союз супружеския верности укрепляяй;

Радуйся, Иоанне,/ земли Российския молитвенниче предивный.

Кондак 11

Песнь достохвальную приносим ти, всеблаженне отче Иоанне, всем житием твоим прославившему Бога. И якоже видехом тя на земли долу у Престола

Акафист святому праведному Иоанну Кронштадтскому чудотворцу

Господня за всех и за вся Владыку мира умолявшего, сице и ныне на Небеси горе вознеси молитвы твоя, во еже непоколебимей быти Церкви нашей, да из рода в род в отечестве нашем благочестно славится Имя Троидинаго Бога поющими Ему: Аллилуиа.

Икос 11

Светозарную свещу, во мраце жития сущим, зрим тя, Богом избранне отче Иоанне, ты бо на Небесех у Престола Божия в сонме святых и Сил Небесных о нас присно ходатайствуеши, воззри на нас, чад твоих, облегчи наша скорби и исцели наша недуги, да зовем ти:

Радуйся, яко в подвизе твоём имя Пресвятыя Троицы дивно прославися;
Радуйся, яко благочестием веры твоея Церковь Христова украсися;
Радуйся, яко состраданием к ближним твоим скорби и болезни, и печали всяческия утоляются;
Радуйся, яко молитвами твоими кающияся грешницы Царствию Небесному приуготовляются;
Радуйся, спасительных благ земных и небесных щедрый поддателю;
Радуйся, от враг видимых и невидимых надёжный избавителю;
Радуйся, яко в земном Едеме, Церкви Христовой, подвигом добрым просиял еси;
Радуйся, яко доброты райская, уготованная праведным, восприял еси;
Радуйся, Иоанне,/ земли Российския молитвенниче преддивный.

Кондак 12

Благодатных даров Духа Святого кладезь преполненный яви в тебе Господь, отче наш Иоанне, да с тобою и мы сих причастницы будем и тако познаем милость Божию к нам, яко не отступит, ниже посрамит нас Господь, егда благодарными усты и чистым сердцем, уповающе на милость благоутробия Его, воспоем Ему: Аллилуиа.

Икос 12

Поюще твое достохвальное житие на земли и славу, юже стяжал еси на Небеси, молим тя, блаженне Иоанне, вознеси о нас молитвы Богу, да помиловани будем в день судный и, спасаеми твоими молитвами, тако тебе воззовем:

Радуйся, богоизбранне и богославленне пастырю земли Российская;
Радуйся, яко воспел еси имя Божие, аки орган мусикийский;

Акафист святому праведному Иоанну Кронштадтскому чудотворцу

Радуйся, пророком и апостолом добре поревновавый;
Радуйся, бегати гнева Божия и творити плоды покаяния мудре наставивый;
Радуйся, об Отечестве и народе нашем теплый молитвенниче;
Радуйся, веры православный истинный исповедниче;
Радуйся, пресветлый лучу, путь к жизни вечней исияваяй;
Радуйся, неисчерпаемую благодать Божию нам открываяй;
Радуйся, трапезо неоскудеваемая, от неяже монаси и мирстии питаются;
Радуйся, учителю Правды Божия, еюже старцы и юноши украшаются;
Радуйся, яко ихже даде тебе Господь, сотворил еси я Богу в радование;
Радуйся, яко от небожителей приял еси о Господе целование;
Радуйся, Иоанне,/ земли Российския молитвенниче предивный.

Кондак 13

О всеблаженне отче Иоанне, всероссийский пресветлый светильниче и предивный чудотворче! Приими хвалебное сие пение и умоли Христа Бога в мире и благочестии утвердити Святую Церковь, нас же всяких бед избавити и в единомыслии веры в союзе любви Христовы соблюсти, да единеми усты и единем сердцем воспоем с тобою Богу: Аллилуиа.

(Этот кондак читается трижды, затем икос 1 и кондак 1)

Акафист святому праведному Иоанну Кронштадтскому чудотворцу

Молитвы святому праведному отцу Иоанну Кронштадтскому

Молитва

О Великий угодниче Христов, Святый праведный отче Иоанне Кронштадтский, пастырю дивный, скорый помощниче и милостивый предстателю!

Вознося славословие Троидиному Богу, ты молитвенно взывал:

«Имя Тебе - Любовь: не отвергни меня, заблуждающагося.

Имя Тебе - Сила: укрепи меня, изнемогающаго и падающаго.

Имя Тебе - Свет: просвети душу мою, омраченную житейскими страстями.

Имя Тебе - Мир: умири мятущуюся душу мою.

Имя Тебе - Милость: не переставай миловать меня».

Ныне благодарная твоему предстательству всероссийская паства молится тебе:

Христоименитый и праведный угодниче Божий! Любвию твоею озари нас грешных и немощных, сподоби нас принести достойные плоды покаяния и неосужденно причащаться Святых Христовых Таин.

Силою твоею веру в нас укрепи, в молитве поддержи, недуги и болезни исцели, от напастей, врагов видимых и невидимых избави.

Светом лика твоего служителей и предстоятелей олтаря Христова на святые подвиги пастырского делания подвигни, младенцем воспитание даруй, юность настави, старость поддержи, святыни храмов и святые обители озари!

Умири, чудотворче и провидче преизряднейший, народы страны нашея; благодатию и даром Святаго Духа избави от междоусобных брани, расточенные собери, прельщенные обрати и совокупи Святей Соборной и Апостольстей Церкви.

Милостию твоею супружества в мире и единомыслии соблюди, монашествующим в делах благих преуспеяние и благословение даруй, малодушных утеша, страждущих от духов нечистых свободи, в нуждах и обстояниях сущих помилуй и всех на путь спасения настави.

Во Христе живой, отче наш Иоанне, приведи нас к Невечернему Свету жизни вечной, да сподобимся с тобою вечнаго блаженства, хваляще и превозносяще Бога во веки веков. АМИНЬ.

Молитва первая

О великий угодниче Христов, святой праведный отче Иоанне Кронштадтский, пастырю дивный, скорый помощниче и милостивый предстателю! Вознося славословие Троидиному Богу, ты молитвенно взывал: Имя Тебе — Любовь: не отвергни меня, заблуждающагося. Имя Тебе — Сила: укрепи меня, изнемогающаго и падающаго. Имя Тебе — Свет: просвети душу мою, омраченную житейскими страстями. Имя Тебе — Мир: умири мятущуюся душу мою. Ныне благодарная твоему предстательству всероссийская паства молится тебе: Христоименитый и праведный угодниче Божий! Любвию твоею озари нас, грешных и немощных, сподоби нас принести достойные плоды покаяния и не осужденно причащаться Христовых Таин. Силою твоею веру в нас укрепи, в молитве поддержи, недуги и болезни исцели, от напастей, врагов, видимых и невидимых, избави. Светом лика твоего служителей и предстоятелей Алтаря Христова на святые подвиги пастырского делания подвигни, младенцем воспитание даруй, юное настави, старость поддержи, святыни храмов и святые обители озари! Умири, чудотворче и провидче преизряднейший, народы страны нашея, благодатию и даром Святаго Духа избави от междоусобных брани, расточенная собери, прельщенные обрати и совокупи Святей Соборной и Апостольской Церкви. Милостию твоею супружества в мире и

Акафист святому праведному Иоанну Кронштадтскому чудотворцу

единомыслии соблюди, монашествующим в делах благих преуспеяние и благословение даруй, малодушныя утеша, страждущих от духов нечистых свободи, в нуждах и обстояниях сущих помилуй и нас на путь спасения настави. Во Христе живый, отче наш Иоанне, приведи нас к Невечернему Свету жизни вечныя, да сподобимся с тобою вечнаго блаженства, хваляще и превозносяще Бога во веки веков. Аминь.

Молитва вторая

О великий чудотворче и предивный угодниче Божий, богоносне отче Иоанне! Презри на нас и внемли благосердно молению нашему, яко великих дарований сподоби тя Господь, да ходатаем и присным молитвенником за нас будеши. Се бо страстьми греховными обуреваемы и злобою снedaемы, заповеди Божия пренебрегохом, покаяния сердечнаго и слез въздыхания не принесохом, сего ради многим скорбем и печалем достойни явихомся. Ты же, отче праведный, велие дерзновение ко Господу и сострадание к ближним своим имея, умоли Всещедраго Владыку мира, да пробавит милость Свою на нас и потерпит неправдам нашим, не погубит нас грех ради наших, но время на покаяние милостивно нам дарует. О святче Божий, помози нам веру православную непорочно соблюсти и заповеди Божии благочестно сохранить, да не обладает нами всякое беззаконие, ниже посрамится Правда Божия в неправдах наших, но да сподобимся достигнути кончины христианския, безболезненныя, непостыдныя, мирныя и Тайн Божиих причастныя. Еще молим тя, отче праведне, о еже Церкви нашей Святей до скончания века утвержденней быти, Отечеству же нашему мир и пребывание испроси и от всех зол сохрани, да тако народи наши, Богом храними, в единомыслии веры и во всяком благочестии и чистоте, в лепоте духовнаго братства, трезвении и согласии свидетельствуют: яко с нами Бог! В Нем же живем и движемся, и есмы, и прибудем во веки. Аминь.

Молитва третья

Отче Иоанне досточудне! Ты добродетельми многими к Богу приблизился еси и дарований духовных от Него сподобился еси: недуги врачевати, страсти прогоняти и скорби утоляти. Темже смиренно молим тя: подаждь недугом нашим исцеление и страстем врачевание, находящия же на нас скорби утоли и радость духовную в сердца наша всели. И помози нам подражательми быти святаго твоего жития и всех благих твоих деяний, яко да сподобимся с тобою наследия Царствия Небеснаго. Аминь.